



宛陵先生文集目錄卷第三十二

送景仁歸蜀焚黃
送中道鄭州拜掃

送子華歸許昌
燕

送周長官知遼
寒食

和諸君游湖見寄
擬試含桃薦寢廟

子華約游園
大風

春風
送侯寺丞知鞏縣

次道家摘寶相花
送南京寇中舍

送韓奉禮隨侍許昌

金明池遊
和應之還邑

送韓仲文知許州

送薛殿丞知達州

和朱學士憶穎川

集英殿宴以雨放

送陳太祝歸河陽

送祖擇之知海州

殤小女

與用文師

小女埽銘

送吳學士歸蔡州

送刁景純

刁景純期水門再別

和荅韓子華

舟中聽汴水

逢王公愷太博

寄題洪州慈濟西軒

送謝著作歸陳州

和石學士官舍十題

勉致仕李秘監

送江南施提點

夜泊虹縣

施景仁邀詠古檜

送提點王判官

淮雨

舟次山陽呈王寺丞

送崔寺丞宰臨海

楚童

寶應道中起
慶曆七年夏

雜詩絕句十七首

目錄終

宛陵先生文集卷第三十二

送范景仁學士歸蜀焚黃

蒼山過秦梁山盡見川陸下馬古城都訪龍得喬
木掃籜開奠席隕淚濕俎肉當時相如歸徒自盛
車轂不聞有是爲事乃今古獨還因問耆舊亦莫
遺隱卜荒祠古栢下殘月杜鵑哭憑君約史筆書
作西來目

送宋中道鄭州拜掃

酣酣道傍杏戢戢壠上栢不知煙火禁但感風露
易開關掃墓隧向樹繫車輓洒淚有餘悲麒麟高

幾尺

送韓子華歸許昌

不值風雨暴杏過梨已開社後清明前鶯與人歸
來湖中水方漫誰共泛其隈儻有問顛顛顛顛未
忘盃

鶯

澁澁隻來鶯飛飛自舞空輕如漢家后斜避楚臺
風斗折撩沙觜相高接草蟲向人全不畏切莫入
吳宮

送周衍長官知遼州

二月遼陽去遼陽草未生春風吹胡沙卷起黃雲
平土人耕耨晚種黍何時成塞地寒且薄百役子
宜輕

寒食

墳塚徧青山高低占原谷向來路已荒今迷問樵
牧涉水到雲林隔崗聞近哭沃酒白楊下悲風何
颼颼雨止梨園殘鳩聲在茅屋

依韻和太祝同諸君遊園湖見寄

陽春何處來客自商丘至一唱新辭工始見故人
意園林誰與遊卉木欣已媚花上有微陰水邊無

近思遙憐數觴豆何必親歌吹牧馬憶當時招延
遺舊地不逢浮沼鴈但見銜魚翠日予謬詞律荅
句嗟蕪累安能接賢彥樂事聯輕騎獨不負春風
塵纓此懷愧

門學士院試含桃薦寢廟詩擬作

交交鳴谷鳥粲粲熟荆桃寢廟此先薦離宮將以
邀既同羞俎實且異獻溪毛露穎明朝日朱光逼
赭袍戴經傳自久漢令著方高天子從茲食群臣
賜亦叨

韓子華約游園上馬後雨作遂歸

誰約玩春物狂風雲驟開擺叢多落葉蔽路足昏
埃逆水鷺迎雨將生鵝怕雷嵇康今轉懶騎馬半
途迴

大風

夜風晝不止天理何可常正當春木榮擺磨枝葉
傷東皇務長養乃值此物狂曷不訴於帝斥之出
遠方風伯有罪五孰肯進皂囊往時歲苦旱救熱
雨欲滂吹之不使下雲雷遂深藏復搖江海波白
日沉舟航又卷關塞沙千里填河隍拔木與退鷁
書傳言已詳今者天柔和煦煦皆敷芳獨爾何不

仁豪怒事雄強既其背天時誅殛固所當
爲鳴兼虎嘯助惡黨亦昌

春風

常愁春雲低誰料春風惡
搖扇無定響折榦時聞
落吹花擁細草送雨來
高閣江燕倚身輕逆飛前
復却

送侯寺丞知鞏縣

侯洛人

伊洛合河流正臨歸鞏路
崖壁人畏崩芹泥岸長
固山迴邑郭見馬入雲煙
暮宰茲雖所淹況與鄉
黨附

宋次道家摘寶相花歸清平里

往歲見此花開遲手擷群芳因醉嗅
今來須約爛熳看及過風雨又已後
主人爲我特殷勤架底深
深撥孤秀密枝陰蔓不爭開薄紅細
葉尖相鬪先時已落已掃除最晚堪
憐子所厚呼童歸遺不可緩金盤付
與急奔驟暮還已見映雲髻初拈尚
覺香在袖官橋夜市正沽酒沽酒共
賞莫待晝

送南京簽判寇中舍

東風莫迎舩舩下黃流急送車猶未
動顧棹已不
及離宮佳氣盤賓幙平時入因君報
親舊將去江

南邑

送韓奉禮隨侍之許昌

岸之側多菖蒲蒲之下多乳魚乳魚可以饌菖蒲
可以類羨君調膳去且樂因使無忘寄我書

金明池遊

三月天池上都人袷服多水明搖碧玉岸響集靈
鼉畫舸龍延尾長橋霓飲波苑花光粲粲女齒笑
嗟嗟行袂相朋接游肩與賤摩津樓金間采幄殿
錦文窠挈榼車傍綴歸郎馬上歌川魚應望幸幾
日翠華過寬入声

和應之還邑道中見寄

向老思舊交欲見恨無翅前時君來都欣喜乃一
至亦既勤我懷酌酒去拘忌自從離洛陽此會無
三四謝尹最賢豪已嗟存沒異因酬馬上篇遂寫
相逢意

送韓仲文知許州

孰不爲太守所榮歸故鄉僚官詫舊識邸吏窺新
章前去別馬上今仰立道傍野老拜車塵里人持
壺漿至家墳麓美謁壠雲日光盛事難盡書且舉
國門觴

送薛殿丞知達州

遠郡古通川雲煙秀重疊江從巴蜀來山與岷峨
接啼鳥異方音青林四時葉使君當問俗市賈皆
紅頰

依韻朱學士廉叔憶潁川西湖春色寄獻
尚書晏公且將有宛丘之命

物景有先後春工無舊新追歡成杳藹寄詠苦逡
巡湖水與濠接岸亭將寺隣艷花簪舞髻弱藻胷
垂緡客奏桓伊笛人歌柳惲蘋何嘗煩几案自得
去埃塵縱語曾忘倦從游未覺頻賦詩高豎古下

筆敏如神每想魂俱往終知夢是因廣騷常慕屈
感遇亦希陳借問摛詞者當時別乘人喜公移幕
府連賞二州春

集英殿賜百官宴以雨放

春來無點雨三月始聞雷曉殿鳴簷急群公罷食
迴燕迎風翅健馬踏霧泥開晚覺微陽透飛光上
綠槐

送陳太祝歸河陽

羸馬度關去夜向河橋歸水風來何急吹裂游子
衣到家莫久留速書赴禮闈大對必有蘊時哉無

闊稀

送祖擇之祕丞知海州

驥有千里足不使千里馳人有抱長才亦復不得
施去去作守長政化尚可爲勿云海濱陋豈無彼
黔黎事舉訟必簡安能忘酒卮水物錯在俎醎腥
應自宜胸山日相對亦莫厭其卑蒼翠入畫戟濃
淡若秀眉但向此中樂用捨乃繫時

戊子三月二十一日殤小女稱稱三首

生汝父母喜死汝父母傷我行豈有虧汝命何不
長鴉雛春滿窠蜂子夏滿房毒螫與惡噪所生

遂飛揚理固不可詰泣淚向蒼蒼

語蕾樹上花瑩絜昔嬰女春風不長久吹落便歸
土嬌愛命亦然蒼天不知苦慈母眼中血未乾同
兩乳

高廣五寸棺埋此千歲恨至愛割難斷剛性剗以
鈍淚傷染衣班花惜落帶嫩天地既許生生之何
遽困

與用文師

師名學佛者何乃愛吾詩吾方嗟世人各各事奔
馳蒼鷹鳥絕海至不異攫鼠鷗所趨有遠近所向

皆餒飢漱水對無語風動庭樹枝

小女稱稱塲銘

吾小女稱稱慶曆七年十月七日生至八年三月二十一日死嗚呼鳥獸螻蟻猶有歲時之命汝不然也汝稟氣血爲人豐然暫然其目瞭然耳鼻眉口手足備好其喜也笑不知其樂其怒也啼不知其悲動舌而未能言無口過動股而未能行無蹈危飲乳無犯食之禁愛惡無有情之系若是則得天真與保和何病夭之遽乎得不推之於偶然而生偶然而化偶然而壽偶然而夭何可必也吾將

衣汝衣歛汝棺葬汝于野亦人道之常分汝之鬼其散而爲大空其復託爲人不可知也其質朽而爲土不疑矣富貴百年者尚不免此汝又何冤瘞之日父母之情未能忘故書之塲非欲傳之父且以志其悲云銘曰

母孕而夢夢維虺虺古占女祥夫其豈然耶復占我夢我遺我稱我名命汝平御妾媵旣厲而乖胡然乎靡應

送吳冲卿學士歸蔡州

孟夏日南歸馬耳豎迎風急雨不及避斷霓明向

東古城汝水傍化俗寄我公君今去拜慶酥酪美
將同

下土橋送刁景純忽大風韓子華先歸遺
其小方巾明日持還副以此詩

昨日汴水頭共餞東去人暴風吹黃沙對面不相
親歸來乘大馬悞擲小方巾平明馳奴還偷樣古
逼真

刁景純期水門再別以風雨不往

餞客客未去明朝當更來風雨尋舩懶車馬向城
迴烏帽吹覺重清樽想誰開終期江上見俗禮聊

損裁

韓子華訪石昌言不遇石有詩韓邀和荅
嘗聞載酒者去訪子雲居乃值徒御出遂令談笑
虛爲黍寧之具題鳳豈有諸一聽負荆語還想蘭
相如

舟中夜聽汴河水聲

夏雨漲黃流夜鳴隣舩柁乘危冒險人不識西山
餓

逢王公慥太博

驚馬不惜蹄出門莫畏泥泥中逢故友十載相乖

睽但怪蒼鬢色班班俯鐵驪少立不及語交策或
東西向晚我還舟君來訪長堤對論出處跡存沒
生悲啼勿言少壯日志意吐虹霓而今七不堪懶
又甚於嵇

寄題洪州慈濟師西軒

西軒無落暉所賴西庭竹竹間有古葉竹上有繁
綠夜雨一洗梢朝陽似晞沐焚香愛此心自不同
諸俗

送謝著作歸陳州

騏驥泥中行偶蹶未千里終當至高衢尚苦泥行

耻今歸雨濛濛嘶鳴欲何止乃念彼名駒近在清
川溪他日見騰驤駑櫪此垂耳

和石昌言學士官舍十題

病竹

水邊移得已傷根枝葉如枯生意少主人不使荒
穢侵遂長琅玕勝凡草

石榴花

春花開盡見深紅夏葉始繁明淺綠祇知結子熟
秋霖不識來時有節竹

薏苡

葉如華黍實如珠移種官庭特葱蒨但蠲病渴付
相如勿恤謗言歸馬援

石蘭

言石曾非石上生名蘭乃是蘭之類療痾炎帝與
書功紉佩楚臣空有意

萱草

人心與草不相同安有樹萱憂自釋若言憂及此
能忘乃是人心爲物易

葵花

此心生不背朝日肯信衆草能翳之真似節旄思

屬國向來零落誰能持

蔬畦

手自除荒手自鋤葱針已插壅薤本朝芸夕灌豈
不勤比食前蒔苗閑且穩

水紅

江天淡淡江水平江岸有花紅作穗今日特向都
城開書時只合銜魚翠

甘菊

世言此解制頽齡便當園蔬春競種到秋猶得泛
其英爛醉莫辭官有俸

蘭

楚澤多蘭人未辯盡以清香爲比擬蕭茅杜若亦
莫分唯取芳聲襲衣美

勉致仕李秘監

淵明歸柴桑家貧食不足當其勇去時不待秫稻
熟借問何以然實耻暫屈辱公常爲近臣曾不輒
媚曲一緣府舍災遂使還秩祿祿仕四十年內乏
金鍾粟歸來託四鄰恹恹無片屋去就異前人其
義已介獨譬之食嗟來應自甘退縮當營負郭田
漸可事水竹

送施景仁太博提點江南坑冶

楚山豈無銅楚匠豈不工大鑪常乏鑄碧卅那得
充積弊在鄉縣孰肯以利籠君今承詔行諭民當
得中苟能使之發亦莫取之窮此乃事可久山深
山自通

夜泊虹縣同施景仁太博河上納涼書事

與君愛清風移榻就明月月落見星繁星繁如晝
熱霑衣輕露隊響岸崩湍齧坐思都城時誰許脚
不鞮

施景仁邀詠泗州普照王寺古檜

來尋淮上寺老檜莫知年劫火已鎔像膠枝寧改
煙根擎怪石入節駭蒼苔堅欲問浮波箭空嗟此
獨傳

送王判官同提點坑冶

地雖不受寶利在與民共務國不務民儻有安得
用孟氏美王囿其說久已誦聊此陳薄言忉怛不
能重

淮雨

雨脚射淮鳴萬鏃跳點起溼魚亂目濕帆遠遠來
未收雲漏斜陽生半幅

舟次山陽呈王宗說寺丞

遠客雖有樂莫如逢故人夜懷夷門時月照楚水
濱自居扁舟上隨處與舫隣且將到此日因使報
朋親

送崔黃臣寺丞宰臨海

補官桐廬時已飽嚴陵釣進吏六百石又得臨海
嶠因之論出處足以見風調洪潮可登觀萬里漲
川竅收縮向何歸由來人莫料憑君能賦才庶或
窮其妙

楚童

楚童能捕魚乃在水邊居手取眼不顧情知獺未
如鬢上浮萍草點點綠有餘既挈不暇理歸來莫
取渠

雜詩絕句十七首

自此實應道中
起慶曆七年夏

蛙行動萍葉候觀作游魚稍稍引兩股已變科斗
書

青草生水中日日隨水長水落何所依撩亂為宿

莽

有蟲託斷葑斷葑日夕流不知止息處隨夫非自
由

荒水浸籬根籬上蜻蜓立魚網挂遠籬野船籬外
入

茸茸翦熟絲雨染燕脂暈滿樹斂黃昏槿花無此

分

青青老鏡葉下有繁實尖浪頭撥船女刺手終不

嫌

岸傍草樹密徃徃不知名其間有啼鳥似與船相

迎

青蠅何處來聚集滿盤間誰知腹中物變化如循
環

水上賣瓜女摘瓜陂上田長麻已不識滿把青銅錢

買魚問水客始得鯽與魴操刀欲割鱗跳怒鬚鬣張

沙頭風雨來帖水野雲黑如觀曹公營萬弩射船

側

前時雙鴛鴦失雌鳴不已今更作雙來還悲舊流

水

度水紅蜻蜓傍人飛款款但知隨船輕不知船去

遠

塘上挽船人塘泥深及脛落日望前村心將道途

競

燕立茅屋脊燕銜芹岸泥巢成同養子薄暮亦同

棲

鵲銜高樹蟬危脇繰車響露腹不曾肥殺之嗟已

往

河畔有釣翁團泥爲甕缶坐想秦人聲思傾杜陵

酒

宛陵先生文集卷第三十二

宛陵先生文集目錄卷第三十三

夢尹師魯

過高郵三溝

過茱萸堰

詠求叔文石硯屏

求叔進道堂夜話

贈劉謀閣副

長蘆江口

金陵懷古

江畔

慈姥石崖上竹鞭

阻風

慈姥磯下

早發

望夫石

過褐山磯值風

褐山磯上港中泊

宿磯上港

謁昭亭廟

昭亭潭上別

宣州環波亭

昭亭山

泊姑蘇江口邀景純

牧牛隔江吹笛

和永中秋邀許發運

與夏張游大明寺

寄麥門冬符公院

送張唐民

秋夜同永叔看月

答永叔不見月

和永叔中秋夜會

觀永叔集古錄

觀舞

留別永叔

觀永叔畫真

畫真來嵩

別後寄永叔

登揚州北門

因目痛有作

宿邵埭呈永叔

寄許主客

迴過三溝

牛背雙鸚鵡

永叔贈石硯屏

岸貧

村豪

晚雲

荷

晚日

寄酬許發運

前日

淮陰

哀王孫

沛公歌

目錄終

宛陵先生文集卷第三十三

五月二十夜夢尹師魯

昨夕夢師魯相對如平生及覺語未終恨恨傷我
情去年聞子喪旅寄誰能迎家貧兒女幼迢遞洛
陽城何當置之歸西望淚緣纓

五月二十四日過高郵三溝

甲申七月七未明至三溝先妻南陽君奄化向行
舟魂去寂無跡追之固無由此苦極天地心矜腸
如抽泣盡淚不續岸草風颼颼樹殭尚疑生大呼
聲耳裂喉柁師爲我歎挽卒爲我愁戊子夏再過感

昔涕交流恐傷新人心
強制指雙眸未及歸旅櫬
悲恨何時休

過茱萸堰

茱萸堰在吳牛死茱萸堰廢吳牛閑吳牛閑東南
百貨來如山

詠歐陽永叔文石硯屏二首

虢州紫石如紫泥中有瑩白象明月黑文天畫不
可窮桂樹婆娑生意發其形方廣盈尺間造化施
工常不沒虢州得之自山窟持作名卿硯傍物
鑿山侵古雲破石見寒樹分明秋月影向此石上

布中又隱孤壁紫錦藉圓素山祇與地靈暗巧不
欲露乃值人所獲裁爲文室具獨立筆硯間莫使
浮埃度

永叔進道堂夜話

海風驅雲來池雨打荷急虛堂開西窓晚坐涼氣
入與公話平生事不一毫及初探易之奧大衍遺
五十乾坤露根源君臣排角立言史書星瑞亂止
由不戢巨惡叅大美微顯豈相襲陳疏見公忠曾
無與明執文章包元氣天地得噓吸明吞日月光
峭古崖壁澁淵論發賢聖暗溜聞鬼泣夜闌索酒

卮快意頻舉挹未竟天已白左右如啓蟄

贈劉謀閣副

聲名赫赫在窮塞眉宇堂堂具丈夫腰劔臂弓輕
赴敵無人不伏魏黃鬚

長蘆江口

風駕晚潮急浪頭相趁過水歸瓜步小舡下秣陵
多鷗舞不停翅鸞飛輕帖波今來學楚客薄暮愛
漁歌

金陵懷古

秦莫恃棧閣吳莫恃漸江不能恃以德二國竟亦降

邇來屢興廢由險輕萬邦誰知荒涼城空存如劔
腔我今經其下弔古語愧嗔嗟哉石頭潮助怒常
春撞

江畔

江畔菱蒲碧無主吳牛夜驅江干歸舟人不悟月
已上花脚野蚊撩亂飛

慈姥山石崖上竹鞭

江水浸石壁峭直無鳥蹤穴垂青竹根瘦虵愁作
龍霹靂雨脚入濕點莓苔封世人不得用八馬今
乖慵

阻風

老魚吹浪不肯休一夜南風打籬響灘下輕舟未
可行山脚盤渦似車輞

慈姥磯下

蘆汀泱泱外露斂見孤嶂行舟每出觀漸近已殊
狀傍來認飲牛正去忽側盜水壑陰若春野鳥時
與相且待風色迴出口始浩蕩

早發

吳雞鳴隔山江月半在水齧齧出岸潮雪雪入蒲
葦解紂泛明鏡接天知幾里我家今不遙正住句

溪尾

望夫石

征骨化爲塵柔肌化爲石高山共蒼蒼臨水望脉
脉青雲卷爲髮缺月低照額千古遺恨深終不見
車軌

過褐山磯值風

山口風偏急磯頭水似煎喧聲殊倦聽逆上正難
牽暗石誰愁礙長途未擬前江心看白浪卷起大
於船

褐山磯上港中泊

風惡舟難進聊依浦裏村岸潮生蓼節灘浪聚蘆
根日脚看看雨江心漸漸昏篙師知蟹窟取以助
清樽

宿磯上港

夜深風浪息月正在南斗遠水生白煙踈螢出荒
莽照解屢爇薪張魚未發筍獨能憐野客游宦
意何有

謁昭亭廟

連峯到溪止澄溜向潭瀉廟道走山腰雀雛鳴屋
瓦古壁畫雲雷空庭儼輿馬眷予來故鄉絜齋陳

奠葺尚想昔壯童維愚託民社每從諸父賽竭至
此祠下今齒踰不惑雙親世似寡過此無所禱曷
慕逢時者

昭亭潭上別

行舟晚解去親戚各還家淚落正濕衣腸翻如轉
車借是昭亭水相隨亦有涯予今游宦意曾不學
匏瓜

宣州環波亭

冒暑駐輪轂徘徊北壕上棟宇起中央芙蓉生四
向今吾太守樂慰此郡人望雨從昭亭來水入句

溪漲蜻蜓立欄角朱鯉吹荷浪岸木影下布水鳥
時引吭心閑不競物興適每傾釀薄暮詠醉歸陪
車知幾兩

昭亭山

曰山何必高要在出雲雨昭亭非峻峯雄雄若蹲
虎旱歲一來祠霈然隨瀝醑有草牧爾牛有薪資
爾斧有溪出其陰有潭在其塢獸則獮與貉魚則
魴與鱖山雜水羽聲下上相雜伍呼名如謙恭號
叫若怒侮崖竹或節踈嶺松或腹腐巨蜂結層房
養子窟深土何事山中人采以爲市賈其容固已

多其忍吾未取

泊姑熟江口邀刁景純相見

時陳州晏
相公醉

尾生信女子抱柱死不疑吾與丞相約安得不顧
期徘徊大江側念此親相知欲留時已晚欲去情
難持引領望軒車豈能慰我思願聞下士禮無曰
屈非宜

見牧牛人隔江吹笛

朝與牛出牧晝與牛在野日暮穿林歸長笛初在
髻面尾騎且吹音響未成雅隨風散遠近舉調任
高下我方江上來平溜若鏡瀉悠悠經醉耳亦足

發蕭酒苟能 and 人心豈必奏韶夏鄭聲實美好
情如剔副況其荒敗跡亦又甚裂瓦南箕成簸揚
寺孟詵修哆我今留此詩誰謂馬喻馬

依韻和歐陽永叔中秋邀許發運

看取主人無俗調風前喜御夾衣涼競邀三五最
圓魄知比尋常特地光艷曲旋教應可聽秋花雖
種未能香曾非惡少休防准衆寡而今不易當

詩云仍約多爲詩准
備共防梅老敵難當

與夏侯繹張唐民游蜀岡大明寺

秋葉已多蠹古原看更荒廢城無馬入破冢有狐

藏寒日稍清迥群山分澹蒼田衣指白水此下是
雷塘

寄麥門冬於符公院

佳人種碧草所愛凌風霜佳人昔已歿草色尚蒼
蒼若陸行載以車水行載以航于今五六年與我道
路長思人不忍弃期植寒冢傍我嗟復北去安得
畢此喪留植精舍中遠挈防根傷他時京峴下不
比野蒿黃

送張唐民

楚甸有行客西風一孤舟遠隨淮月上若與星槎

浮野岸襲幽芳氣清露已秋得意美魚蟹白酒
問沙頭

秋夜同永叔看月

青天有右目昏明不常開常時翳雲氣古鑑生莓
苔秋夜特清徹乃顧漸西迴靈兔不搗藥是夜無
纖埃與君玩流景置酒臨層臺單衣濕白露鳴鴈
方南來以言歡未終鴈聲一何哀

中秋不見月答永叔

天嫌物兼美而使密雲藏已向石屏見河湏照席
光

和永叔中秋夜會不見月酬王舍人

主人待月敞南樓淮雨西來斗變秋自有嬋娟侍
賓榻不須迢遞望刀頭池魚暗聽歌聲躍蓮的明
傳酒今優更愛西垣舊詞客共將詩興壓曹劉

觀永叔集古錄

古碑手集一千卷河北關西得最多莫怕他時費
人力他時自有錦蒙馳

觀舞 坐上作

誰憐嬌小好腰支老大而今莫那伊太守風流未
應淺更教多唱楚人辭

留別永叔

舊日友競留連我征時已晚但言會合難豈道行路
遠行路到有期別離未即返明當各相思念此去
且懶

觀永叔畫真

良金美玉不可畫可畫唯應色與形除却堅明盡
非寶世人何得重丹青

畫真來嵩

廣陵太守歐陽公今爾畫我憔悴容便傳髣髴在
縑素尸欠勁直藏心曾與我貨布不肯受此之鑿

卜曾非庸公今許爾此一節爾只丹青其亦逢

別後寄永叔

前日辭親淚又爲別友出愁極反無言欲言詞已
窒荷公知我詩數數形美述茲道日未堙可與古
爲匹孟盧張賈流其言不相昵或多窮苦語或特
事豪逸而於韓公門取之不一律乃欲存此心
欲使名譽溢竊比於老郊深愧言過實然於世道
中固且異謗嫉交情有若此始可論膠漆

登揚州北門

樓上山如淡墨畫城中水似輕藍按揚州今似刀

州景似聽中和樂職歌

因目痛有作

已爲貧孟郊拚作瞎張籍詩句但口吟世事不眠
歷既能分好惡難用變青白讀書聽吾兒且未廢
朝夕

宿邵埭聞雨因買藕芡人迴呈永叔

秋雨鴈來急夜舟人未眠亂風燈不定暝色樹相
連寒屋猛添響濕窻愁打穿明朝持藕使書此寄
公前

寄許主客

昨日山光寺前雨今朝邵伯堰頭風野雲不散低
侵水魚艇無依尚蓋蓬藕味初能消酒渴蓼芳猶
愛照波紅揚州有使急迴去敢此寄聲非塞鴻

八月二十二日迴過三溝

不見沙上雙飛鳥莫取波中比目魚重過三溝特
惆悵西風滿眼是秋蕖

牛背雙鸚鵡

牛背雙鸚鵡煙波共入時草枯行解美日晚趁群
遲閑戴寧辭遠相鳴不間雌初驚牧人去飛上野
桑枝

廣陵歐陽永叔贈寒林石硯屏

磷磷石屏上濃淡樹林分隔水見寒島暗枝藏宿
雲賢哉吾益友持以贈離羣琥珀不須問中心多
化蚊

岸貧

無能事耕穫亦不有雞豚燒蚌燠槎沫織蓑依樹
根野蘆編作室青蔓與爲門稚子將荷葉還充犢
鼻視

村豪

日擊收田鼓時稱大有年爛傾新釀酒飽載下江

船女髻銀釵滿童袍毳氎鮮里胥休借問不信有
官權

晚雲

黢黢日脚雲斷續如破灘忽舒金翠尾始識秦女
鸞又改爲連牛綴燧懷齊單伺黑密不置額額城
未剗風吹了無物猶立船頭看

荇

荇蕩光於水鉤牽入遠汀淺黃雙蛺蝶五色小蜻
蜓老死懷江女飄浮笑楚萍西風莫苦急孤蘂有
餘馨

晚日

晚日晴還暖人閑見物機葉枯蟲自累窻響蜜尋
歸林下見收柿水邊聞擣衣吾嗟久爲客却愧寄
荆扉

寄酬發運許主客

淮上秋來物意閑又乘輕舸信帆還一浮一沒水
中鳥更遠更昏天外山斜幅纏踣兵吏至濃金洒
紙領珠頒欲酬已覺不能敵盡日臨風思自慳

前日

前日楊州去酒熟美蟹螯秋風淮陰來沙暖拾蚌

螭不言爾貧富只繫其鄙夷漢重二千石後世何
忽之

淮陰

青環瘦鐵纜繫在淮陰城水脛多長短林枝有直
橫山巛一足走妖鳥九頭鳴韓信祠堂古誰將跨
下平

哀王孫

泗水赤龍將欲飛瘦蛟在泥雲未歸冰壘煮灰寒
水擊長大王孫抱飢色誰知適自下鄉來日具可
哀猶未食菰飯白漿持與君王孫王孫何復云

沛公歌

赤帝醉提龍劍行徑草没人壯士驚白蛇斷裂不
可續神嫗哀哀夜深哭酒醒自負氣生虹從者曰
畏天下雄秦皇玉輿來向東安知隱在芒碭中婦
人自識雲氣從王命艱哉豐沛公

宛陵先生文集卷第三十三

宛陵先生文集目錄卷第三十四

使風

田家屋上壺

夢後寄裴如晦

昭信淮上

小村

難知

九山

淮岸

原有禽

浮來山

泊下黃溪

濠梁感懷

渦口

夢諸公餞仲文

過塗荆山

舟上采菊

朝暮

荆山

塗山

曉日

雞聲

采杞

泊榭澗觀渡

看山寄中道

暮雨

細雨樵行

晨鴉

會稽婦

九日次壽州

泊壽春龍潭

穎上得鯉為膾

立家渡早發

水次蘇花

夜行憶山中

村醪

川上田家

發勾陵

聞鴈

牽船人

田人夜歸

言張甥不捷鄉薦

聞櫓

晚鷗

新晴

項城阻風

斫膾懷永叔

夜漁

驚鳥

相公後園四題

和許主客夜會

和相國屋上菊叢

寒菜

送裴節推歸京

十月菊上蜂

送江學士睦倅

和民樂

和晚花

聞進士販茶

自此宣州至和
二年五月後

梅雨

烏駁燕巢

五月十三日大水

目錄終

宛陵先生文集卷第三十四

使風

跨下橋南逆水風十幅蒲帆響若弓
淮波帶日魚鱗紅
岌岌飛上北斗中
龜山始撞人定鍾
岸草澁澁鳴秋蟲

田家屋上壺

脩蔓屋頭綴大壺
簷外垂霜乾葉猶苦
風斷根未移
收桂煙突近
開充酒具遲
賤生無所用
會有千金時

九月二日夢後寄裴如晦

裴生安健否試問鴈經過
處士賦鶯爲鷺將軍養駱
駝食魚今飽未索米奈貧
何昨夜分明夢持書認
篆窠

昭信淮上

清淮渺然去白浪勢如奔
同發已先遠獨行將向
昏洲長寧辨路夜泊偶依
村燈火稍覺亂應聞人
語喧

小村

淮關州多忽有村棘籬踈
敗謾爲門寒雞得食自
呼伴老叟無衣猶抱孫野
艇鳥翹唯斷纜枯桑水

齧只危根嗟哉生計一如此
謬入王民版籍論

難知

自古難知不遇人朝爲蛇
鼠暮龍麟魏齊客溺箕
中死亭長妻輕跨下貧白
石夜歌誰與進黃金懷
印自能伸丈夫只患無才
業何恨區區逐路塵

九山

我經九山問野叟崔嵬一
無安曰九且恐斷岸積
瓊玖復意陂原多產韭又
疑堆壠若柱灸四者未
悟叟不言使我臨流獨搔
首

淮岸

秋水刷土骨峭瘦如老石虛沙歸島嶼寒浪漱竅
隙下過白魚尾上有蒼獺跡平崗自相連野籜鳴
風櫟

原有禽倏鳴升遽默下

小禽不盈握羽翮自輕捷裊裊上雲鳴聲窮如隕
葉雀懷啄粟娛鷄有棲蒿愜嗟嗟力甚微枉與鷹
鷂接

浮來山

舊說此山
產雲母

秦鬼驅卵沙聚結無蒼翠誰云海上移能與潮浮
至洞噓蛟鼉腥廟畫風雷異雲母今有無庶爲仙

藥餌

泊下黃溪

黃溪晚來泊得見田家微刺艇斜陽下耕洲載耒
歸牛鳴向牢犢大喜入人衣復有返樵者檐枯翹
雉肥

濠梁感懷

天子昔封禪吾叔從金輿迴首泰山下出建雙隼
旛來尋觀魚臺遂遠承明廬當時十五詠螢照墨
石書

渦口

秋水見灘底淺沙交浪痕白魚跳處急宿鴈下時
昏帶月入渦尾落帆防石根清淮行未盡明日又
前村

夢同諸公錢仲文夢中坐上作

已許郊間陳祖席少停車馬莫催行劉郎休恨三
千里樽酒十分聽我傾

過塗荆二山遇暗石

淮流兩山間勢束秋漲急聚石如伏兵斂斂波下
立輕舟不可防而况昧所習暗值柂已毀後者戒
前及同發去漸遙更愁寒灘澁

舟上采菊

泯泯平慢流行當季秋月演漾過汀洲汀洲芳杜
歇白露夜正霏黃菊寒更發采以泛酒卮不獨映
華髮

朝暮

氣候輒未定寒暄朝暮間挾纒水風生衣綌川陽
還綠草藏邃岸枯櫟植高山且非天時異順理心
自閑

荆山

和楚人茲楚地泣玉山無所記但見楚人誇產玉

古廟幽幽無鬼哭，儻有鬼定無足。

塗山

古傳神禹迹，今向舊山阿。莫問辛壬娶，從來甲子多。夜淮低激射，朝江上嵯峨。荒廟立泥骨，品頭風雨過。

曉日

出舟曉日升，曛波上爛爛。黃金鎔幕歷，紫煙生鏡中。釣舡似畫分，橫縱風莫從。虎雲從龍變，作霏霞重復重。

雞聲

雞聲踏曉呼，呼起扶桑烏。含光如車輪，碾雲蹤跡無。誰教夸父逐，遠向鄧林趨。復從海底轉，循環似轆轤。

采杞

誰謂岸無杞，條其長矣。誰謂杞無實，爛其皇矣。掇彼征矣，檐旣盈矣。捨棘與蠹，造此宜酒。維此宜酒，我挹我注。我飲我助，以養我顛。

泊檝澗觀渡

隔岸呼舟檝，臨河立馬牛。解鞍沙上慙，沉網渚間收。殘日銜沙尾，孤帆落戍頭。莫愁暄作雨，晚水白。

煙浮

看山寄宋中道

前山不礙遠斷處吐尖碧
研青點無光淡墨近有
跡前林橫白雲復與後
嶺隔孤舟川上人引望
不知夕安得老畫師寫
寄幽懷客

暮雨

水上魚吹白露山頭雲
與龍附潭中水作潭中
雨朱鼈飛過吳洲去鯉
魚相隨不知數老蛤銜
泥在深處

細雨樵行

蛟人困卧寒潭底帖波
濛濛垂白綃波上女兒
飛輕撓逆流自與郎去
樵風吹鬢髮不及撩鴉
翅卷起萬鬣尾翹濃纈
羅帶長繞腰日暮下來
吹短簫

晨鴉

雲昏月黑鴉不知鼓聲
瑟瑟鷄報啼睥睨未辨
夫東西癡離噪舞群翅
低野桑葉卷風淒淒濃
霧不起寒雨迷晨鴉却
歸巢上棲

會稽婦

食藕莫問濁水泥嫁婿
莫問寒家兒寒兒鰥黑
面無脂驥子縱瘦骨骼
奇買臣貧賤妻生離行
歌負

薪何媿之高車來駕建朱旗銅牙文弩擐犀皮官
迎吏走馬萬蹄江潮晝起橫白霓舊妻呼載後乘
歸悔淚夜落無聲啼吳酒雖美吳魚肥儂今豢養
慙猪雞園中高樹多曲枝一日挂與桑蟲齊

九日次壽州

昔人把菊望青楹今我持酒無黃花自催屋裏紅
鱗膾不彈墻頭白項鴉壽春城高枕淮水綠蒲踈
踈暮帆起登臨不學孟參軍帽墜山風費嘲紙

泊壽春龍潭上夜半黑風破一舟

盲風吼空來不識前山遮迴激入灣口暗浪騰水

涯喧聞破我船沉沒驚一家晦昧若塗漆心緒如
亂麻燈光不出戶鬼火空照沙百物任漂蕩薄命
誰怨嗟但存此空舟坐類鳥寄槎妻孥皆失色一
夕鬢欲華詹惶俟天明頃刻抵歲遐雨寒雞唱遲
况乃城上鴉

穎上得鯉魚爲膾懷餘姚謝師厚

青菘潭上老賴尾網中魚買作秋盤膾還思遠客
書越壘橙熟久楚飯稻春初雖去故鄉遠不嫌爲
饌踈

丘家渡早發

曲穎若秋蛇屈盤鱗甲活問成得耕人拾魚逢祭
頽草窠殘野燒樹挂經流沫百里相對看頻行媿
迂闊

水次辭花

秋雨日霏霏碧花生疊疊水邊有神女粧去遺翠
鬢岸側小家婦不知所宜愜未得未還人自將渾
面帖

夜行憶山中

青熒鬼火動不悟前山雨昏徑梟鳥鳴獨行毛髮
聚楠葉枯綴林風動疑有虎低迷薄雲開心喜淡

月吐

村醪

雨濕破荆籬風搖樹亞旗小槽聲不急挈榼問沽
遲摘果野棠熟望人舩大隨燈前相對飲還似昔
過時

川上田家

斜光隔河明入照桑柘下臯壠生來麥苗青青尚堪
把遠見牛羊歸相親童稚野醉歌秋草間頗與世
家寡

發勻陵

秋雨密無迹濛濛在一川孤村望漸遠去鳥飛已
先向晚雲漏日微先人倚船安知偶自適落岸逢
沙泉

聞鴈

濕雲夜不散薄處微有星孤鴈去何急一聲愁更
聽心應失舊侶翅已高青冥幾日江海上鳧鷖共
滿汀

牽船人

沙洲折脚鴈疑人鋪翅行奈何暮雨來復值寒風
生濕毛染泥滓縮頸無鳴聲爾輩正若此猶勝被

堅兵

田人夜歸

田收野更迫墟里隔煙陂荒徑已風急獨行唯犬
隨荆扉候不掩稚子望先知自是一生樂何須問
井爲

行次潁州聞張甥宗亮不捷鄉薦以詩唁
而迎之

風前汝陰道雨冷江南書始歎與意異何慙定鑑
踈但能存楚玉切莫道黔驢不負當時約馳迎一
乘車

聞櫓

靜夜有舟下中流聞櫓聲隔牕燈已暗卷幔月微
明漸向寒灣遠遙應宿枕驚客心何苦急曾是不
緣名

晚鷗

晴川帶微陽鷗鳥雙飛去雙飛如有歸並宿向何
處汀寒霧幕歷永落沙沮洳不避近行舟應知心
寡慮

新晴

陰雲忽掃盡朝日吐清光萬里不礙日衆鳥欣晴

吮草樹已搖落山川尚鬱蒼百事擇佳日佳日唯
晴陽

將次項城阻風舟不能進

逆水寒風急輕舟晚不前因來泊古渡聊且上平
田草軟行方穩鶉鷺去瞥然却尋孤岸遠吹幘亂
華顛

斫膾懷永叔

高河古穴深下有蒼鱗鯽出水鯉將飛落刀細可
織香粳炊正滑白酒美少力但欠平生歡共此中
路食

夜漁

夜漁歸自速短艇若飛雲水動月猶白擘音人不
聞迴身明燭底撫卷至宵分我以此爲足勞勞非
爾群

驚鳧

驚鳧鳧雖避人終戀舊所泊盡背船頭去却從船尾
落湏知取勢高不是初飛錯

十月三日相公花 小飲賦四題

拒霜

木杪芙蓉花開非紅艷早常畏晚霜寒朱華競衰草

九月二十八日牡丹

香包已向青春發又見秋深特地開應笑菊殘無
意思不能邀賦洛陽才

殘菊

零落黃金蕊雖枯不改香深叢隱孤秀猶得奉清
觴

三日讌集

蕭然寒圃有殘芳吟徧朱欄向夕陽旣許坐陪公
袞貴却慙蒿羽接鸞鳥凰

依韻許主客北樓夜會

一月能逢幾笑歡高樓紅蠟滴金盤吟餘隴首雲
初散唱盡陽關露已寒不管星河漸西落自將煙
水去程寬當時坐客各南北誰憶重遊泛木蘭

謹和相國屋上菊叢

屋上有叢菊結根深瓦縫既無地勢美又乏土力
擁乃因塗明生不由人所種亦能應節開焉取入
公用公來步廣庭聞鴈目始縱忽見粲然英降植
合常從賓僚席其傍詠玩意已重物莫厭僻遠會
遇良可頌

寒菜

畦蔬收莫晚圃吏已能供根脆土將凍葉萎霜漸
濃不應虛已筋還得間庖糞食旨蓄詩人詠從來用

御冬

送裴節推歸京

遠水未生凍輕舟歸大梁岸迴初向月篙滑始霑
霜清世豈淹俊上公存薦章行應重對策莫愧漢
賢良

十月菊上蜂

黃蜂得晴日不道菊開稀向藥晚寒起落叢無力
飛輕輕難自舉怙怙一何微莫問巢房處斜陽奈

欲歸

送江學士睦州通判

涉淮淮水淺沂溪溪水遲君到桐廬日正值采茶
時試問嚴陵跡今復有誰知

和民樂

歲晚場功畢野老相經過有酒自斟酌適意同笑
歌大兒緝牛衣小兒護雞窠困廩見餘積息成靡
負戈林間落熟果屋裏鳴寒梭會待朔雪時狐兔
生直羅飶鮮持作腊贈之不言他是非了莫問此
理當何如

和晚花

春花莫厭早秋草莫厭遲各不相羨慕榮枯乃繫
時芙蓉東籬英雖晚亦自宜霜前給給開霜後差
差萎深處有孤夢寒月尚見披野蜂徒愛香凍翼
不能支抱枝無力去憫然見恩私

聞進士販茶

自此宣州至和
二年五月後

山園茶盛四五月江南竊販如豺狼頑凶少壯冒
嶺險夜行作隊如刀槍浮浪書生亦貪利史筭經
箱為盜囊津頭吏卒雖捕獲官司直惜儒衣裳却
來城中談孔子孟言語便欲非堯湯三日夏雨刺昏

墊五日炎熱譏早傷百端得錢事酒肉屋裏餓婦
無糶糧一身溝壑乃自取將相賢科何爾當

梅雨

三日雨不止蚯蚓上我堂濕菌生枯籬潤氣醜素
裳東池蝦蟆兒無限相跳梁野草侵花圃忽與欄
干長門前無車馬苔色何蒼蒼屋後昭亭山又被
雲蔽藏四向不可往靜坐唯一牀寂然忘外慮微
誦黃庭章妻子笑我閑曷不自舉觴已勝伯倫婦
一醉猶在傍

烏毀燕巢

堂間兩胡燕哺雛街百蟲老鴉亦養子偷雛燕巢
中燕巢忽墮地六七皆命窮赤身無羽翼腸斷彼
雌雄來往徒鳴聲安得置室宮我閔樓簏數俄已
彊雨風從今更生卯不若受女娥

五月十三日大水

誰知山中水忽向舍外流誰知門前路已通溪中
舟窮蛇上竹枝聚蚓登階陬我家地勢高四顧如
湖澆浮萍穿籬眼斷葑過屋頭官吏救市橋停車
當市樓應念此中居望不辯馬牛危湍瀉天河
漫漫無汀洲群蛙正得時日夜鳴不休戢戢後池

魚隨波去難留揚鬢雖自在江上多網鉤紛紜
閭里兒踊躍覓學泅吾慕孔宣父有意乘桴浮

宛陵先生文集卷第三十四

